



Agong tinjau persiapan penghantaran bantuan ketiga kepada Palestin

Disember 18, 2023 @ 4:56pm

SEPANG: Yang di-Pertuan Agong Al-Sultan Abdullah Ri'ayatuddin Al-Mustafa Billah Shah semalam berkenan meninjau persiapan terakhir penghantaran ketiga misi bantuan kemanusiaan sumbangan Malaysia ke Palestin menerusi Ops Ihsan di Terminal Kargo Lapangan Terbang Antarabangsa Kuala Lumpur (KLIA) di sini.

Seri Paduka yang diiringi Timbalan Perdana Menteri, Datuk Seri Dr Ahmad Zahid Hamidi, meluangkan masa kira-kira sejam memeriksa bantuan berkenaan yang dikumpulkan di gudang penyimpanan di terminal berkenaan selain turut memeriksa bantuan yang dimasukkan ke dalam pesawat kargo sewaan khas untuk menghantar bantuan itu.

Menurut kenyataan media Wisma Putra, penghantaran itu membabitkan 60 tan muatan pelbagai barang termasuk 35.57 tan barang perubatan, 6.62 tan makanan sedia dimakan, 4.35 tan barang keperluan bayi dan 13.46 tan persiapan musim sejuk termasuk tilam dan selimut.

Melalui penghantaran ketiga itu, Malaysia sudah menghantar barang bantuan mencecah 100 tan, selepas penghantaran pertama dan kedua masing-masing membabitkan barang seberat 20 tan.

Pesawat khas berkenaan dijangka berlepas melalui KLIA awal pagi esok dan mendarat di Lapangan Terbang Tentera Al-Arish, Mesir pada hari sama, menurut kenyataan itu.

"Bantuan berkenaan akan diserahkan kepada Persatuan Bulan Sabit Merah Mesir untuk disalur kepada penduduk Palestin di Gaza," kata kenyataan itu.

Sementara itu, Wisma Putra memaklumkan kerjasama rentas antara agensi dan badan bukan kerajaan (NGO) bertujuan memastikan gerak atur proses bantuan kemanusiaan kepada rakyat Palestin di Gaza lebih tersusun, bersepada dan efektif di bawah seliaan kementerian itu.

Ahmad Zahid berkata Ops Ihsan telah membuktikan keberkesanan dalam pengurusannya melalui penggunaan sumber dan kepakaran pelbagai organisasi yang terlibat secara tersusun dan efisien.

"Kerjasama yang julung kali diadakan ini ternyata berhasil. Kolaborasi ini berjaya mengelakkan pertindihan mahupun penyelewengan bagi memastikan bantuan yang diberikan jelas memenuhi keperluan, dan benar-benar sampai kepada golongan yang disasarkan," katanya.

– BERNAMA